



## 2yèm Etap: Si w respekte toule sèt (7) kritè sètifikasyon ki nan 1ye Etap la, siyen Deklarasyon an epi mete dat sou li.

- Chak granmoun ki sou kontra lwaye a oswa kontra lojman an ki respekte kondisyon yo eksplike nan 1ye Etap la ta dwe siyen Deklarasyon an. Nan kèk sikonstans, tankou moun ki fè yon deklarasyon enpo ansanm, li ka apwopriye pou yon moun nan kay la bay yon deklarasyon ki siyen nan non lòt rezidan ki granmoun ki sou kontra lwaye oswa kontra lojman an. Ou kapab itilize Deklarasyon CDC a, li disponib nan lyen sa a: <https://www.cdc.gov/coronavirus/2019-ncov/downloads/declaration-form.pdf>.

## 3yèm Etap: Bay mèt kay ou a oswa Ajans Lojman Piblik ou an yon kopi Deklarasyon ou siyen an.

- **Enpòtan!** Si w pa siyen Deklarasyon an pou soumèt li bay mèt kay ou a oswa Ajans Lojman Piblik ou an, yo kapab toujou degèpi w poutèt ou pa peye kòb lwaye a ant 4 septanm 2020 rive 31 desanm 2020. Men, Deklarasyon an mande pou w sètifye pou bay enfòmasyon ki vrè anba sanksyon pou fo temwayaj. Sa vle di nenpòt fo deklarasyon oswa deklarasyon malatchong oswa mankman ka mennen nan pousuit penal ak pousuit sivil pou amann, penalite, domaj enterè oswa anprizònman, kidonk **asire w respekte TOUT kritè sètifikasyon nan 1ye Etap la anvan w siyen Deklarasyon an.**
- Si yo te kòmanse yon degèpisman poutèt ou pa peye kòb lwaye anvan 4 septanm men yo poko fini li, ou kapab toujou siyen Deklarasyon an epi soumèt li bay mèt kay ou a oswa Ajans Lojman Piblik ou an pou yo pa degèpi w.
- Si sa posib, voye Deklarasyon an pa imèl oswa yon lòt mwayen ki bay resi yon fason pou gen yon prèv ki montre ou te voye li. Pa egzanp, yon lòt mwayen kapab se kourye sètifye nan Sèvis Lapòs Etazini avèk yon resi ou mande. Kenbe yon kopi Deklarasyon ou siyen an (yo) nan dosye ou tou, ki gen ladan dat ak lè ou te voye li oswa remèt li bay mèt kay ou a oswa Ajans Lojman Piblik ou an.
- Moun ki nan pwogram kupon yo ka oblije bay Ajans Lojman Piblik yo a ak mèt kay yo a Deklarasyon an tou.

## Sonje:

- Si w an mezi pou peye tout kòb lwaye a oswa yon pati ladan li, w ap toujou bezwen fè sa.
- Sispansyon degèpisman nan kad Òdonans CDC a pa menm ak sispansyon degèpisman ki fini kounye a ki nan Lwa CARES la<sup>1</sup>. Sispansyon degèpisman ki nan Lwa CARES la te fini 24 jiyè 2020. Pi gwo diferans ant toude se dapre Òdonans CDC a: (1) lokatè yo oblije siyen yon Deklarasyon ki gen toule sèt (7) sètifikasyon yo pou yo pa degèpi yo poutèt yo pa peye lwaye epi (2) yo ka mande lokatè yo peye frè reta, penalite ak lòt frè yo dwe akòz lwaye yo pa peye.
- Ou ka gen lòt pwoteksyon yo si otorite Eta w la, otorite lokal ou a, oswa otorite teritwa w la te enpoze yon sispansyon ki pi long oswa ki pi estrik sou degèpisman yo ki bay menm nivo pwoteksyon sante piblik la oswa plis pwoteksyon pase egzijans yo endike nan Òdonans CDC a.
- Ou toujou gen obligasyon pou respekte tout lòt kondisyon ki nan kontra lwaye w la ak règ kote w ap viv la. Yo kapab toujou degèpi lokatè yo pou zak kriminel, lòt zak oswa vyolasyon kontra lwaye a.

## Konsèy sou Fason pou Kominike ak Mèt Kay Ou a oswa Ajans Lojman Piblik ou a:

Si w gen difikilte pou peye kòb lwaye a oswa ou pa kapab peye ankò, kontakte mèt kay ou a tousuit pou pale sou opsyon yo. Nan moman kriz finansyè sa a ki lakoz moun gen estrès, mèt kay ou a ka gen ti pwoblèm pa li tou. Eseye kominike avèk li klè epi nan tèt frèt. Men kèk konsèy pou ede w fè yon bon chita pale avèk mèt kay ou a:

- Se pou onèt lè w ap eksplike pwoblèm ou genyen an. Si COVID-19 la oswa lòt difikilte ap malmennen w, eksplike li jan sa afekte revni ou. Moun ki nan pwogram lojman piblik ak pwogram kupon yo ta dwe kontakte Ajans Lojman Piblik yo a pi bonè yo kapab pou li egzamine revni yo genyen kounye a epi ajiste peman lwaye yo a.
- Panse pou siyale tout resous ak opsyon èd ou te jwenn.
- Eksplike fason pèt lojman an pral afekte fanmi ou.
- Poze kesyon sou aranjman peman yo.
- Kenbe tout imèl ak konvèzasyon tèks mesaj epi pran nòt sou lè ou te pale nan telefòn oswa fas-a-fas.

<sup>1</sup> Yo Adopte li nan Seksyon 4024 nan Lwa sou Èd, Apezman, ak Sekirite Ekonomik pandan Kowonaviris, "Lwa CARES" 2020 (Lwa Piblik 116-136).